

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- गृहमंत्री अमित शाह होरें आखेआ जे सरकार नै जम्मू कश्मीर च आतंकवाद खत्म करने लेई पक्क ध्यायी दी ऐ।
- उधमपुर-श्रीनगर-बारामुला रेल राबते तैह्त संगलदान-रियासी रेल सेवा दा पैह्ला पैह्ला परीक्षण सफल रेआ।
- प्रधानमंत्री नरेन्द्र मोदी होर औंदी 30 जून गी मन की बात प्रोग्राम दी 111मीं किशत तैह्त देसै गी संबोधत करगंन।
- अज्ज ईद-उल-अजहा मनाई जा'रदी ऐ। राष्ट्रपति, उपराष्ट्रपति ते प्रधानमंत्री होरें लोकें गी इस मौके पर मुबारकबाद दिक्ती ऐ।

<><><><><><>

Shah Security

केन्द्रीय गृहमंत्री अमित शाह होरें आखेआ ऐ जे नरेन्द्र मोदी सरकार नवाचारी तरीकें नै आतंकवादिएं पर सख्त कारवाई करने लेई वचने बद्धी दी ऐ। गृहमंत्री होरें सुरक्षा अजेंसिएं गी आखेआ जे ओ आतंकी गतिविधिएं दी शैका आले इलाकें दी पंछान करने ते उत्थें सुरक्षा दे मुद्दे पर ध्यान देन। श्री शाह होरें आतंकवाद गी बिल्कुल बी बर्दाश्त नेई करने दी नीति गी दोहरांदे होई आखेआ जे सरकार जम्मू कश्मीर थमां आतंकवाद गी जड़ा थमां खत्म करने च कोई कसर नेई छोड़ग। उनें भरोसा दोआया जे जम्मू कश्मीर च अमन शांति ते स्थिरता दी हिफाजत करना केन्द्र सरकार दी सब्बने शा प्राथमिकता चा इक ऐ। कल नमीं दिल्ली च इक उच्ची सतहद दी बैठक दी अध्यक्षता करदे होई उनें सब्बने सुरक्षा अजेंसिएं गी निर्देश दिक्ता जे मिशन दे रूपै च तालमेल कन्नै कम्म करदे होई आतंकी गतिविधिएं पर तुरत कार्यवाही करन। उनें आखेआ जे जम्मू कश्मीर च आतंकवाद खलाफ लड़ाई निर्णायक दौर च पुज्जी गेदी ऐ। हाल दियां घटना बांदै करदियां न जे आतंकवादिएं दियां संगठित गतिविधियां घट्ट होआ करदियां न ते ओ हून छद्म युद्ध दा रस्ता इख्तोयार करा'रदे न। उनें सुरक्षा अजेंसिएं गी कश्मीर घाटी ते जम्मू दे इलाकें च आतंकवाद कन्नै निबड़ने च हासल सफलता गी दोहराने दे निर्देश दिक्ते।

राष्ट्रीय सुरक्षा सलाहकार अजीत डोभाल, जम्मू कश्मीर दे उपराज्यपाल मनोज सिन्हा, केन्द्री गृह सचिव मजय भल्ला, इंटैलीजेंस ब्यूरो दे निदेशक, सेना दे वरिष्ठ अफसर सेनाध्यक्ष जनरल मनोज पांडे ते नामांकित सेनाध्यक्ष जनरल उपेन्द्र द्विवेदी, केन्द्रीय सशस्त्र पुलस बलें दे महानिदेशक, जम्मू कश्मीर दे मुख्ख सचिव, पुलस महानिदेशक ते किश होर वरिष्ठ अफसर बी बैठक च मजूद हे ।

<><><><><><>

Shah-Amarnath

केन्द्री गृहमंत्री अमित शाह होरें कल नमीं दिल्ली च लाई गेदी इक उच्ची सतह दी बैठक च इस म्हीने दी 29 तरीकै गी शुरू होने आली सलाना श्री अमरनाथ जी दी यात्रा लेई कीती गेदिएं तैआरिएं दा जायजा लैता । बैठक दरान श्री शाह होरें सुरक्षा बलें गी सौहगे ते सतर्क रौहने दे निर्देश दित्ते ते श्री अमरनाथ यात्रा दरान सुरक्षा बलें दी मुनासब नफरी तैनात करने लेई आखेआ । उनें असरदार सुरक्षा प्रबंधें लेई बक्ख-बक्ख अजेंसिएं च आपे'चें तालमेल दी जरूरत पर जोर पायजं श्री शाह होरें आखेआ जे प्रधानमंत्री नरेन्द्र मोदी हुंदी अगुवाई च सरकार नै श्री अमरनाथ औने आले श्रद्धालुएं दी सौख ते सुरक्षा दा पक्का धेइया कीते दा ऐ । जम्मू कश्मीर सरकार नै यात्रुएं दे निर्विघ्न पंजीकरण, सुरक्षा बलें ते यात्रुएं दी कॉनवाई दी आओजाई, उंदे रौहने-बौहने दी बवस्था, मैडिकल सहूलतें, बेहतर रस्ते, बिजली-पानी दी सप्लाई ते मोबाइल संपर्क दी पूरी बवस्था दे प्रबंध कीते दे न ।

<><><><><><>

LG-Awaam Ki Awaz

उपराज्यपाल मनोज सिन्हा होरें आवाम की आवाज कार्यक्रम दे 3 ब'रे मुक्कमल होने पर कल्लै दी कड़ी गी लोकें दे नमित लाया । इस मौके पर बोलदे होई उनें जम्मू कश्मीर दे विकास च लोकें दे अनमुल्ले योगदान ते प्रतिबद्धता दी सराहना कीती ते आखेआ जे मकामी बसनीकें दे कीमती सुझाएं बक्ख-बक्ख क्षेत्रें च निति निर्माण न शड़ा मदाद कीती ऐ सगुआं जमीनी सतह पर जनभागीदारी गी बी तगड़ा बनाया ऐ । श्री सिन्हा होरें रियासी आले आतंकी हमले च शहीद होए दे बसनीकें गी श्रद्धांजलि दिंदे होई उनें लोकें गी इक जुट होइयै रौहने ते जम्मू कश्मीर च आतंकी ढांचे गी पूरी चाल्ली तबाह करने आस्तै सुरक्षा अजेंसिएं गी जानकारी देने दी अपील कीती ।

<><><><><><>

Trial Run

रेल मंत्री अश्विनी वैष्णव होरें घोषणा कीती ऐ जे जम्मू कश्मीर च संगलदान थमां रियासी तगर रेल सेवा दा सफल परीक्षण करी लैता गेआ ऐ जेह्दे नै घाटी ते मुल्खै दे दुए हिस्सें बशकार रेल राबता पूरी चाल्ली मुकम्मल होई गेआ ऐ। सोशल मीडिया पर चनां दरेया पर दुनिया दे सब्बने थमां उच्चे पुल परां रेलै दे लंघने दी इक वीडियो सांझा करदे होई रेल मंत्री होरें दस्सेआ जे उधमपुर-श्रीनगर-बारामुला रेल लिंक दा सारा कम्म तकरीबन मुकम्मल होई चुके दा ऐ। सुरंग नंबर 1 दा कम्म इआं थहोडा बकाया ऐ। मंत्री होरें आखेआ जिसलै कटरा ते रियासी रेल रस्ते पर सुरंग नंबर 1 दा कम्म मुकम्मल होना ऐ तां उधमपुर-श्रीनगर-बारामुला रेल राबता कम्म करना रंभ करी देग ते घाटी गी मुल्खे दे दुए हिस्सें कन्ने जोड़ने आला सुखना सच्च होई जाग।

<><><><><><><><>

Chug Fly Over Jammu

भारतीय जनता पार्टी दे राष्ट्री महासचिव ते केन्द्र शासत प्रदेश जम्मू कश्मीर ते लद्दाख दे प्रभारी तरुण चुग होरें दिल्ली-अमृतसर कटरा एक्सप्रेस वे पर जम्मू दे कुंजवानी सैनिक कालोनी छन्नी हिम्मत ते नरवाल सेक्टर च फलाई ओवर दे निर्माण कन्ने सरबंधत मुद्दे गी केन्द्री सड़क परिवहन ते जरनैली शिड़क मैहकमे दे मंत्री नितिन गडकरी हुंदे अगगे पुट्टेआ। इक प्रेस विज्ञप्ति च बीजेपी दी राज्य इकाई नै आखेआ ऐ जे श्री चुग होरें केन्द्री मंत्री होरें गी अवगत करोआया ऐ ते कुंजवानी आले हिस्से थमां अगड़ी शिड़कै गी खंबे पर आधारित फलाई ओवर पर बनाए जाना लोडचदा ऐ की जे कंधे आली शिड़क कन्ने मकामी दकानदारें दे कम्मकाज पर माड़ा असर पौग ते कन्ने गै आम लोकें गी बी दिक्कतें-परेशानिएं दा सामना करना पौग।

<><><><><><><><>

Man Ki Baat

प्रधानमंत्री नरेन्द्र मोदी होर इस म्हीने दी 30 तरीक गी आकाशवाणी थमां मन की बात कार्यक्रम च देस विदेस दे लोकें कन्ने अपने बचार सांझे करगंन। एह म्हीनेवार रेडियो कार्यक्रम दी 111मीं कड़ी होग। श्री मोदी हुंदे उपरोतली त्रीह बारी प्रधानमंत्री चुने जाने मगरा एह पैहला मन की बात कार्यक्रम होग। लोक टोल फ्री नंबर 1800-11-7800 राएं औंदे कार्यक्रम राएं औंदे कार्यक्रम ताई अपने बचार ते सुझा देई सकदे न। एह्दे इलावा ओ नरेन्द्र मोदी ऐप जां My Gov ओपन फोरम पर बी ऑनलाइन सुझाह देई सकदे न। 28 जून तगर भेजे गेदे सुझाएं ते बचारें गी कार्यक्रम च शामिल कीता जाग।

<><><><><><><><>

Eid-Ul-Azha

शहादत दा ध्यार ईद-उल-अजहा जिसी बकरीद दे नां कन्नै बी जानेआ जंदा ऐ, अज्ज जम्मू कश्मीर च धार्मिक जोश जज्बे कन्नै मनाई जा करदी ऐ। इस ब'रे अज्ज 17 जून गी इस्लामिक कलंडर दे खीरले म्हीने धून्धल हिज्जा दा 10मां ध्याड़ा ऐ। ध्यार गी अमन, रमानदारी ते सुचारू ढंगै सिर मनाने आस्तै प्रशासन आस्सेआ व्यापक प्रबंध कीते गेदे न ते एहतियाती गैई पुट्टी गेदियां न। तोआई मुस्लिम समुदाय दे लोक अज्ज बडलै थमां गै ईद दी नमाज अदा करने तांई अपनिएं करीबी मसीतें च पुज्जा'रदे न। जम्मू च जामा मस्जिद दे कन्नो कन्नी इलाके दिएं होर दुइएं मसीतें च बी ईद दी नमाज अदा कीती जा'रदी ऐ।

<><><><><><><>

President-VP Eid

राष्ट्रपति द्रौपदी मुर्मू ते उपराष्ट्रपति जगदीप धनखड़ होरें ईद-उल-अजहा दे मौके पर देशवासिएं गी ममारकबाद दित्ती ऐ। अपने सनेह च राष्ट्रपति होरें आखेआ जे ईद-उल-अजहा दा पवित्र ध्यार त्याग ते बलिदान दा प्रतीक ऐ। राष्ट्रपति होरें गलाया जे एह ध्यार हिर्ख-प्रेम, आपसी भाईचारे ते समाजिक सद्भाव दा सनेआ दिंदा ऐ। उनें गलाया जे एह लोकें गी मानवता दी बिजन स्वार्थ सेवा लेई प्रेरित करदा ऐ। उपराष्ट्रपति श्री धनखड़ होरें लोकें थमां एकता, दया ते इक्कजुटता दे मुलें पर बचार करने दी अपील कीती जेहड़े ना शड़े इस ध्यार सगुआं पूरे समाज दी बुनियाद न। उनें गलाया जे एह ध्यार परोआरें ते समुदायें लेई सांझिएं खुशिएं ते सद्भाव दी भावना कन्ने आने दा इक महत्वै आला ध्याड़ा ऐ।

<><><><><><><>

PM-Eid

प्रधानमंत्री नरेन्द्र मोदी होरें बी ईद-उल-अजहा दे मौके पर शुभकामना दित्तियां न। सोशल मीडिया पोस्ट च श्री मोदी होरें आखेआ जे एह आपसी भाईचारे ते इकजुटता दे बंधन गी होर बी मजबूत करै ते सब्बने गी सेहतमंद, नरोआ ते खुशहाल रखे।

<><><><><><><>

Eid-LG

उपराज्यपाल मनोज सिन्हा होरें बी ईद-उल-अजहा दी पूर्व संजा पर लोकें गी ईद दी बघाई ते शुभकामनां दित्तियां न।

री सिन्हा होरें अपने सनेह च आखेआ जे ईद-उल-अजहा दा पवित्र ध्यार निस्वार्थ त्याग ते मिली जुलियै रौहने दा प्रतीक ऐ। उनें गलाया आओ इस मौके पर आपसी भाईचारे ते एकता दी भावना गी होर बी मजबूत करने दे अपने धेइयै दी तस्दीक करचे।

<><><><><><>

Cricket

आईसीसी टी-20 क्रिकेट विश्व कप च कल रातीं फ्लोरिडा च पाकिस्तान नै आयरलैंड गी त्रै विकेटें कन्नै हराई दित्ता। पाकिस्तान ते आयरलैंड दौनें पैहले गै प्रतियोगिता थमां बाहर होई चुके दे न। जिल्ले के भारत ते पैहली बार खेडा'रदा अमरीका ग्रुप-ए थमां सुपर-8 च पुजजी चुके दे न।

<><><><><><>

Weather

जम्मू दे मैदानी इलाके च सख्त गर्मी थमां लोके गी कोई राहत नेई थोआ'रदी ऐ। खुश्क ते गर्म मौसम करियै आम जन जीवन अस्त व्यस्त ते बुरी चाल्ली प्रभावत ऐ। कल जम्मू च बद्धोबद्ध तापमान 43.7 डिग्री सैल्सियस दर्ज कीता गेआ जिल्ले के कल रातीं दा घट्टोघट्ट तापमान 26.8 डिग्री सैल्सियस रेआ। मौसम विभाग नै अगले किश दिनें तगर मौसम दे गर्म ते खुश्क बने रौहने दी पेशगोई कीती ऐ। उआं मैहकमे नै 19 तरीक गी बरखा ते अंधी झक्खड़ झुलने दी संभावना जताई ऐ।

<><><><><><>